

07 AUG 2002

Mahathir-Tiba

DR MAHATHIR TIBA DI BALI UNTUK LAWATAN KERJA DUA HARI

Oleh: Mohd Kamel Othman

DENPASAR (BALI), Ogos 7 (Bernama) -- Datuk Seri Dr Mahathir Mohamad tiba petang ini untuk memulakan lawatan kerja dua hari dan mengadakan pertemuan dengan Presiden Megawati Sukarnoputri.

Ketibaan Perdana Menteri di Lapangan Terbang Antarabangsa Ngurah Rai pada 4 petang disambut oleh Menteri Luar Indonesia Dr N. Hassan Wirajuda.

Yang turut berada di lapangan terbang itu adalah empat menteri Malaysia terdiri Menteri Luar Datuk Seri Syed Hamid Albar, Menteri Perusahaan Utama Datuk Seri Dr Lim Keng Yaik, Menteri Tenaga, Komunikasi dan Multimedia Datuk Amar Leo Moggie dan Menteri Pembangunan Wanita dan Keluarga Datuk Seri Shahrizat Abdul Jalil.

Sekumpulan pelajar Malaysia di Bali turut menyambut ketibaan Perdana Menteri.

Sejurus tiba, Dr Mahathir dibawa ke Istana Tampaksiring, satu setengah jam perjalanan dengan kereta.

Di Istana Tampaksiring, Perdana Menteri telah disambut oleh Megawati dan suaminya, Taufiq Kiemas sebelum mereka mengadakan pertemuan singkat.

Malam ini, Dr Mahathir akan menghadiri jamuan malam di Wisma Negara di Istana Tampaksiring.

Esok, beliau akan mengadakan pertemuan tertutup dengan Megawati. Selepas itu, mereka akan mengetuai perbincangan peringkat delegasi.

Kedua-dua pemimpin itu akan menyaksikan majlis menandatangani perjanjian persefahaman berhubung soal pembangunan keluarga dan wanita, soal penghantaran pulang tenaga kerja Indonesia dari Malaysia, dan kerjasama dalam bidang imigresen.

Mereka juga akan menyaksikan pelancaran Majlis Perniagaan Bersama Malaysia-Indonesia, pelancaran Lembaga Persahabatan Malaysia-Indonesia (PERMAI) dan Lembaga Persahabatan Indonesia-Malaysia (PRIMA).

Pada sebelah tengah hari, Dr Mahathir dan Megawati akan melancarkan projek bekalan gas asli dari Pulau Natuna ke Pulau Duyong, Terengganu. Bekalan gas itu akan disalurkan menerusi saluran paip sepanjang 96 kilometer.

Perdana Menteri dijadual berlepas pulang ke Kuala Lumpur pukul 4.15 petang.

-- BERNAMA

MKO AFY MAI